



Ferschders Gredche.

Kennschd de 's Ferschders Gredche?
Net, Freind, dann dhuscht mer lääd;
Dann so e saumer Mäddche
Gebbt's nimmi frieh un schbäd.
Die Guckelcher wie Beilche,
Die Bäckelcher so wääch
Un ershd ehr Kerschemeilche,
Dodriwer geht kää Weeg!

Glei hinnerm Niehlegadder
Do isß de Dannewald,
Wo sie mit ehrem Badder
Seid Johre wald un schald;
Er hott mols Bää" gebroche,
Werrd ald un groo un schteif;
Sie dhut em Dagsdurch kocher,
Schtoobt Dwends ihm die Peif.

Es fehrt e häämlich Pädche
Durch Hecke un Gebisch

Deß kennt nor 's Ferschders Gredche
Un noch wer, nämlich ich;
Glei' hinnig unserm Wißje
Geht's in de Wald enaus
Un iwer e klä" Wißje
Schtehscht vorrem Ferschderhaus.

Hedd ich nor soviel Dahler,
Als ich 's schunn gang bereits,
Ich bin jo juschd käl" Prahler,
Doch hedd ich 's aus 'm Kreiz;
Dann dhett ich uff dem Pädche
Froh noh de Wiehl häm ziehn,
Dann geebt es Ferschders Gredche
Bei mer Fraa Millerin!

Doch so aah sinn mer eenig,
Uns werd net lang die Zeit;
Un bin ich aah käl" Kenig,
Schließlich kummd's doch so weit.
Sie neehd de ganze Summer
Schunn an ehrem Hochzigschtaad. —
Wann de vielleicht willschd kumme,
Wischt heeflich ei"gelaad.
